

Taetas

Sepinien xa Diamu te Uvei xa Pol Tetisi teha mi Taetas

Visi tetis uvei ak?

Pol tetis sepinien ak e hram xa sangas ni 64 AD (ngan ak hram 32 tetutou ni maten e mea rilomunen na Iesu). Pol tetis uvei ak tetutou ni tumulen xil xa di Polien na Eloheoh Xil (ukila upus rut sepinien ngan xil teni e Sepinien xa Diamu te 1 Timoti). Pol tepol vituei e aelan tahal Krit tetel Taetas melengien vahis (1:5). Di, teling Taetas ti ilaxat Kristin hu xil e rute nen ak (1:5; 2:15; 3:12-13).

Visi iaxa tevuli uvei ak tetiamu?

Pol tetis sepinien ak teha mi Taetas (1:4). Vatei, Pol teha tangan vapus vat xil te sias tahal Serusalem tangan vahit kil polien nan del ngan xil xa latave Siu ti (2 Tim 2:8). E melele nen ak, xi nggur Taetas xa tave ngan Siu ti e be Kristin tei tuei (Kal 2:3). Melengien holu, Taetas tehusil Pol e kakaoen nan: lutepol vituei e Korin (2 Kor 7:6; 8:23), Dalmesia (2 Tim 4:10), e aelan tahal Krit mun (1:5). Pol tehiteni mini tangan ihosei ti elda xil, isel xat Kristin xil linahusil ti mun pispisien xil te luvosen, e ipol ituxoh melele xa Pol isil moletin sav mei ixolesi e polien nan (3:12).

Pol tetis uvei ak veneh?

Pol en tehei tangan vasep kil sexien hos na vat xil te sias mi Taetas - Elda xil, lilaxat kuh moletin xil te sias, lipol ixeih e polien na Hi, e lipispisi mi moletin xil ni pispisien xil xa bos (1:5,9). Pol tehiteni tehit elda tei ihe hisit moletin tei xa ilaxat kuh tim san (1:6) e ixuxou kuhi ve sexien nan xil (1:7-8).

Pol en tehei tangan vassel xat Taetas usil moletin xil te luvosen - Vengan sexien na mol-Krit xil tesa pupu (1:12), Pol tesis Taetas tangan isel xat xil ixeih e ipispisi mi xil ni pispisien xil xa momal (1:10-16). Vanut Siu xil iexil tehei tangan di langor vatel Taetas, e Pol tesel xati tangan xi napol ni ti ngongoren natel xil (3:9-11).

Pol en tehei tangan vasep kil sexien hos na Kristin xil mi Taetas - Pol tesis Taetas tangan ipispisi kuhi mi ngan xil xa labe momatu (2:2), atou xil (2:3-5), tiram maxoe xil (2:6-8) e slev xil mun (2:9-10). Pol tehit kila xa Hi di misa xeihen mi ngan xil xa di langgusil xati (2:11-15).

Pol en tehei tangan vasep kila mi Taetas ni sexien hos xil xa Kristin xil ti lipol ni mi mosav xil - Pol en tehei Kristin xil te sias liti e tomat itel mosav xil, ti lilong xat kavmen (3:1), e linasepin ti nasa mi mosav xil (3:2). Tehitini mun xa xil linapol ni ti ngongoren natel ngan xil xa nenemien nae misav (3:9-11). Kristin xil iexil nabong ni ti xa, tetiamu, xil mun latepol ni sexien tesa xil ak, e Hi tehiles meulien nae (3:3-7).

Vatit nenemien tei te uvei ak de Taetas 1:5

Melele xa natelinguk otete aelan tahal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan.

Vatit nenemien tei mun te uvei ak de Taetas 3:4-5

E tave ti neta xa ratemak, Hi tepisen hosien e eheien nan mi xir e teteh meulien e xir. Xi iaxa teleh rerat xir ra tesaen xil nar, tave ti ve holesok xil xa bos xa xir ratepol ni. !E-e! Xi teleh rerat xir vengan en misae e xir. Ma xi tesa Ninin Eo mi xir xa mikas motin xir ra tesaen nar xil e misa meulien hu e sexien hu xil mi xir.

Naha iaxa de sepinien ak?

1. Pispisien xil usil sexien hos xil na elda xil (1:1-9)
2. Pispisien xil usil moletin xil te luvosen (1:10-16)
3. Pispisien xil usil sexien hos xil na Kristin xil (2:1-15)
4. Pispisien xil usil sexien hos xa lipol ni mi mosav xil (3:1-15)

Sepinien xa Diamu

1 ¹Inou, Pol, iaxa nadis uvei ak e nabe moletin tei te polien na Hi e eloheoh tei na Iesu Kristo.

Hi tehosei nou e tesil nou tangan ha nitutou ni neketen na ngan xil xa Hi tehosei xil mei labe nan. Xi tesil nou mun tangan nipispisi mi xil usil reitinen te suse xa likila mei limal pe meten. ²Ngan xil ak likila lihusil hisit neketen ak vengan xa lanesi xa Hi isa meulien sal mi xil. Vengan xa, tetiamu ni melele xa Hi tepeas ni ut etan, tehiti xati xa isa meulien ak mi xir, e Hi misakras valuvos. ³E melele xa xi bit momal, Hi xa di miteh meulien e moletin xil misak ni naha xa tehiti xati mei mistal be reitin sung. Reitini, naha xa Hi tesoson ni, xi di mikirati nggo sepinien xa tesa ni minou e tesemae ni minou tangan ti nihithitini mi mosav xil.

⁴Natis bat mi xouk, Taetas, xa ongoni natuxuli xati, ve neketen naralu be tei takes.

Nasisi xa Hi Tamer e Iesu Kristo, xa miteh meulien e xir, lalisa eheien hos itel tomat nalu iti minuk.

Lihosei Elda Xil Itep

⁵Melele xa natelinguk otete aelan tahal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan: ⁶elda tei, meulien nan imal, e nenemien nan iti atou nan xati kestang. Horamue nan xil lihusil xat Iesu e sexien nae xil ihos tangan moletin sav xil ti linaseputut ni xil linahit vatixil nggeih e di latalong xat tamexil ti. ⁷Melele xa uling moletin tei mei ihe vat te sias tangan ti valaxat moletin xil na Hi, sexien nan imese. Nahe moletin te koaien ti, e tinen nasoh ti namanon. Nahe moletin te mumunen ti, nahe moletin te tutuen ti, e nahe ho mani ti. !Namak ti! ⁸The hisit moletin xa di nggur pilei moletin sav xil e tim san, e di ien bei neta xil kestang xa bos. Nenemien nan ixeih e polien nan xil, kakaoen nan ihos, meulien nan imal, e mikila ixuxou kuhi ve sexien nan xil. ⁹Elda ak, ihur xat kuh pispisien usil Iesu xa xir di rapispisi ni. Ikila xa pispisien xil ak be reitin. Imak, ma xi ikila ti itiamu ni mosav xil e suse te momalen, e ti ipispisi mi xil usil naha xa be reitin. E melele xa mosav xil laseputut ni pispisien nan xil, elda ak ikila ipisen ni mi xil xa naha xa xil di lasepin ni be neta sav tang.

¹⁰Nasepin ni mak vengan xa moletin xil holu latamemere ni vat xil te sias ti. Pispisien na moletin xil ak be voti tang xa reitinen tovuol en e di laluvos moletin sav xil tangan lihusil xat xil. Xil di lapispisi ni xa moletin xil vus na Hi lihe vexahu ixoni ngan xa Siu xil di lapol ni. ¹¹Taetas, usikoe xol pispisien nae xil. Vengan, xil di lapispisi ni holesok xil xa tamal ti tangan lavur mani vaxo en. E misak ni, moletin xil vus e tim xil di lastokovein neketen nae. !Ngan ak tamal ti! ¹²Tehe provet tei nae tang tahal Krit iaxa tesepe usil sexien nae xil tehit,

“Mol-Krit xil, vehakut di laluvos e sexien nae mikavui.

Xil labe mah e, vehakut, di lanem kes ni vange tang.”

¹³Sepinien ak be reitin. Ma bos xa xouk usepin ixeih mi xil. Ngan ak isak ni xil lihusil pispisien xil kestang xa momal. ¹⁴Linahusil ti mun tumulen te luvosen xil na Siu xil, mu rae xil na ngan xil xa lasin reitinen na Hi. ¹⁵Ngan xil xa meulien nae momal pe met Hi, holesok xil vus momal tang mi xil.^a E ngan xil xa meulien nae tamal ti pe met Hi e lataneket ti e Iesu, ma holesok xil vus tamal ti e xil vengan xa nenemien nae be muis. Ngan xil ak latakil ti naha xa momal e naha xa tamal ti.

^a 1:15 Ngoni ngan xa 1 Tim 4:3-5 biteni, tisa xil te luvosen xa labe Siu lapispisi ni xa rut sexien xil e rut anien xil mun mikila vapol ni moletin tei namal ti pe met Hi. E Pol biteni xa melele xa di ranggur neta ngan del nenemien tei xa momal, anien ak momal tang, mu sexien ak momal tangan rapol ni.

¹⁶Nggo valonge, xil labit lakil Hi, e sexien nae xil di pisen ni xa latakil ti. Latalong xat Hi ti, sexien nae pupuru tang, e lasakras lapol ni neta tova vahos e meulien nae.

Kakaoen xa Nggusil Pispisien te Reيتينen

2 ¹E xouk, upispisi ni holesok xil xa nggusil pispisien te reيتينen. ²Upispisi ni ngan xil xa labe momatu tangan liti merou, sexien nae xil ihusil nenemien hos xil kestang, e likila lixuxou kuhi ve sexien nae xil. Neketen nae e Hi ixeih, eheien nae iti e mosav xil, e tave ti neta xa melengien xil te xeih ti imei, xil lihusil xat Iesu vehakut.

³Thusil sexien nen tak, upispisi ni tovolih xil tangan lipisen sexien te merereen mi moletin xil vus. Xil ti linaseputut ni mosav xil ti, e linahe vat mumunen ti. !Namak ti! Xil ti lipispisi mi mosav xil ni sexien hos xil kestang. ⁴Ixo sexien ak, xil ti lipispisi mi ate maxoe xil tangan ti lipisen eheien nae mi tiramue e horamue nae xil. ⁵Tovolih xil ti lipispisi mi xil mun tangan lixuxou kuhi ve sexien nae xil e lipol ihos mi moletin sav. Xil limaen ni xil mi tiramue nae xil kestang e nave mi tiramue sav xil ti. Ate maxoe xil ak mei likila xa lilaxat kuh tim sae xil e ti liling nenemien nae ihe tan tangan lipol usil nenemien na tiramue nae xil tang. Sexien hos nae xil ak isak ni moletin sav xil lisakras ti lisep purun sepinien xil na Hi.

⁶Thusil nenemien xati ak, uhiteni mi tiram maxoe xil tangan lixuxou kuhi ve sexien nae xil. ⁷Taetas, xouk mun, ixo sexien hos nam xil, upisen suse xa bos tangan mosav xil likila lihusili. E melele xa upispisi mi moletin xil, upol ni e sexien tei xa moletin sav xil likila linesi e limerere ni. ⁸E sepinien xil nam, usepin usil neta kestang xa be reitin xa moletin sav xil lasakras lasep xar ni. Isak ni, ngan xil xa di laketeh misa ni xir lihe unoun vengan xa lisakras lavit ti neta vasa vaha xat xir.

⁹Ngan xil xa labe slev, xil liling nenemien nae ihe tan e lipol ihusil nenemien na suv nae xil. E holesok xil xa ti lipol ni, lipol ni ihos tangan suv nae xil lihesi xil ven. Slev xil linaso rilomun ni sepinien xil ti naha mi suv nae xil, ¹⁰e linakan ni ti neta ra xil. Lipol ihos imak tangan suv nae xil likila liling nenesien nae iti e xil. Sexien hos nae xil isak ni moletin xil vus ti linemi xa pispisien nar xil usil Hi xa miteh meulien e xir bos pupu.

¹¹Bos xa upispisi mi xil usil holesok xil ak vengan xa eheien hos na Hi mei mistal ngamu e di miteh meulien e xir vus. ¹²Eheien hos na Hi ak di pispisi mi xir tangan ti ristokovein sexien tesa xil e ti rinamaen ni ti sexien xil te ut etan nalihi nenemien nar. !Namak ti! Eheien hos na Hi isak ni xir rixuxou kuhi ve sexien nar xil, rikakao ihos, e rihusil sexien xil xa momal tevi e melele xa rameul radi e ut etan. ¹³Di rapol ni mak vengan xa di radatil melengien hos tei xa di bemei. E melengien nen ak, xir ranesi xa Iesu Kristo xa be Hi xa di miteh meulien e xir, xi mei istal itel miehen e xeihen nan. ¹⁴Xi maen xoteh meulien nan mei mat binat

xir tangan valeh rerat xir ra xeihen te tesaen. Mak ma, xi miteh meulien e xir e misak ni xir mei rabe nan. Reitin, xi pol ni xir mei rameluv ra sexien xil xa mikavui e misak ni xir rabe vanut moletin tei nan xa rasav ni moletin teisav xil. Io, xir rabe moletin nan xil xa iexir bei pupu tangan ripol ni polien hos xil xa momal tevi pe meten.

¹⁵Hi milinguk e polien nan e misa xeihen minuk. Ma, upol itel xeihen ak e melele xa ti upispisi mi moletin xil usil suse xa momal tangan ti lihusili, e melele xa ti usel xat xil tangan linahusil ti mun suse te tesaen. Ixo sexien xil ak, onamaen xil ti linanem male ni xouk.

Sexien na Moletin Xil Xa Langgusil Hi

3 ¹Usep rilomun ni mi moletin nam xil tangan ti liling nenemien nae ihe tan e ti lipol ihusil nenemien na moletin xil te kavmen e eilep sav xil nae e ti litacong xat xil. Xil livue xat xil tangan lipol ni polien hos xil vus. ²Uhiteni mun mi xil tangan linasepin ti nasa mi moletin sav e linangor ti natel xil. !Namak ti! Xil lipol ni ihos mi xil itel sexien te merouen, e ti lipisen merereen mi xil vehakut. ³Iexir nabong ni ti xa, tetiamu, xir mun ratehe hisit moletin xil xa ratexonni xil tang: ratehe unu, ratnalong xat Hi ti, e di ratehusil suse xil vus te luvosen. Tetiamu, sexien tesa xil e eheien te holesok xil te ut etan tevulu xat xir e di tetel xir. Ratehe elu mi mosav xil, e ratehesi xir melele xa ratepus mosav xil latemot e tesaen. Moletin xil, iexil teat xir, e xir mun, iexir di teat xil. ⁴E tave ti neta xa ratemak, Hi tepisen hosien e eheien nan mi xir e teteh meulien e xir. ⁵Xi iaxa teleh rerat xir ra tesaen xil nar, tave ti ve holesok eah xa bos xa xir ratepol ni. !E-e! Xi teleh rerat xir vengan en misae e xir. Ma xi tesa Ninin Eo mi xir xa mikas motin xir ra tesaen nar xil e misa meulien hu e sexien hu xil mi xir. ⁶E vengan xa hosien nan mahulong pupu, Hi tesa Ninin Eo mei tepolu e meulien nar. Maten na Iesu Kristo xa teteh meulien e xir iaxa tepol ni suse temase tangan Ninin Eo imei ve xir. ⁷Eheien hos nan misak ni xi tepol ni xir ramal pe meten, tave ti neta xa rabe moletin tesa xil tang. Misak ni, xosali, xir rakila mei rabe horamue nan xil e ranesi xa be reitin xa xir rihur holesok hos xil melele xa ha riti itela e ut nesao. ⁸Sepinien xil xa di nabiteni minuk be reitin.

Misak ni, vehakut, ieok bei xa xouk tit upispisi mi moletin xil usil holesok xil ak. Upol ni imak tangan ngan xil xa di langgusil Hi, nenemien nae ixeh tangan ti lipol ni polien hos xil. Hisit pispisien xil ak bos e di dutou ni xir vus. ⁹Xouk onamae ni xouk ti ha onasep tetovoe natel xil usil holesok xil xa be neta sav tang. Ngan xil ak di lasep usil avu kokot nae bemei duxoh xil, e iexil bei tangan ti langor pupu usil rae xil na Siu xil. Hisit sexien xil ak misakras vatutou ni ti moletin e be neta sav tang. ¹⁰Xosxa moletin tei di pol ni sexien xil ak xa di misak ni moletin xil di latasil ra xil, vatei takes, ha usepin ixeh mini tangan istokovein sexien

nan xil ak. E xosxa tastokovein sexien nan xil ti, ma ha usepin mini vatei mun. E xosxa dit nggulehi ni sexien nan xil, ma onamaen ni ti mun namei vituei natel xamim. ¹¹ Vengan xa sexien nan xil nggeih, e di pisen ni xa xi be hisit moletin tesa tei xa tekavitou ni reitinen na Hi ngamu e di milihi longpangasien bemei e xi tasen.

Sepinien Kor na Pol

¹² Taetas, nisil Artemeas mu Tikikas ihat minuk tangan tei e xalu ihur voninom. Ti, xouk usak pisi tangan mei upus nou e taon tahal Nikopolis, vengan xa inou nita tak ha ituxoh hoxalite te aveti xil te an tesa xa di bemei. ¹³ Usak pisi otutou ni Apolos, itel Sinas xa be moletin te ling xat rae xil en.^b Xalu ti lalohusil suse nalu lalohat xiak. Ma nasasuk tangan upus rin nalu e usa holesok xil xa ealu ihei tangan lalilehi itel xat xalu. ¹⁴ Moletin xil nar likila lisa xil ve polien xil xa bos. Imak, ma likila ti litutou ni ngan xil xa labe terume ni holesok xil holu. Moletin nam xil linati votei ti. Bos mak mu lipol ni neta ngan xa ihos itel meulien nae.

¹⁵ Ngan xil xa madi vituei inggak, labit ‘bos makoe’ mi xouk. E uhit ‘bos makoe’ namem mi tumem xil te neketen.

Nasis tangan eheien hos na Hi iti mi xamim vus.

^b 3:13 Sinas tehe loa tei.